

मार्निंग डोगरी न्यूज बुलेटिन, सर्में. 09.20 Hrs

Headlines

- केंद्री गृह मंत्री अमित शाह होंरें उच्च अधिकारिणं दी बैठक लाइए जम्मू-कश्मीर दी सुरक्षा स्थिति दा जायजा लैता।
- मुखमंत्री उमर अब्दुल्ला होर अज्जै थवां विधायकें ते जिला विकास कौंसल दे Chairpersons कन्नै बजट थवां पैहले आहिलयां बैठकां लाडन।
- प्रधानमंत्री नरेंद्र मोदी होंरें आखेआ जे सरकार दे कल्याणकारी जत्नै कन्नै 25 करोड़ लोकें गी गरीबी थवां बाहर कड्डेआ गेआ ऐ।
- राष्ट्रव्यापी वाटरशेड जातरा च जम्मू-कश्मीर बी शामिल होग। ग्रामीण विकास मंत्री जावेद डार होर कठुआ थवां जातरा वैन गी झंडी दस्सिए रवाना करडन।
- हून खबरें दी तफसील कन्नै जगमोहन शर्मा।

<><><><><><><>

Amit Shah

केंद्री गृह मंत्री अमित शाह होंरें जम्मू-कश्मीर च हाल च होई दी आतंकवादी घटनाएं दे मददेनजर इक बैठक लाइए प्रदेश दी सुरक्षा स्थिति दा जायजा लैता। एहदे च सेना, जम्मू-कश्मीर पुलिस ते खूफिया एजेंसिणं शाह होंरें गी जम्मू-कश्मीर दी मौजूदा सुरक्षा स्थिति ते

आतंकवाद खिलाफ कार्रवाइएं ते तैयारिएं दे बारे च जानकारी दिती गई। एह बैठक कुलगाम जिले च होए दे आतंकवादी हमले, जेदे च साबका फौजी दी मौत होई गई ते ओहदी घरे आहली ते इक बच्ची घायल होए हे, दे इक दिन मगरा लग्गी। जम्मू-कश्मीर दे उपराज्यपाल मनोज सिन्हा, डीजीपी नलिन प्रभात, सेना प्रमुख जनरल उपेंद्र द्विवेदी ते सेना, पुलिस ते सिविल प्रशासन दे अधिकारिएं एहदे च हिस्सा लैता। केंद्री मंत्री हुंदे आसेआ नीम फौजी बलें दे अधिकारिएं कन्नै इक होर सुरक्षा बैठक लाने दी मेद ऐ।

<><><><><><>

CM-Omar

मुख्यमंत्री उमर अब्दुल्ला जिंदे कश वित्त मंत्रालय दा कम्मकाज बी ऐ, होर 3 मार्च गी शुरू होने आहले विधानसभा दे बजट सत्र च बजट पेश करंगन। मुख्यमंत्री होर अज्जै थवां विधायकें ते जिला विकास कौंसल दे अध्यक्षें कन्नै बजट सोयां पैहले आहिलियां बैठकां लांगन। उमर होर अज्ज ते कल्ल 4-4 जिलें दे विधायकें कन्नै मलाटी करंगन। मुख्यमंत्री होर अज्ज अनंतनाग, बडगाम, कठुआ ते साम्बा जिले दे विधायकें ते डीडीसी चेयरपर्सन्स कन्नै मलाटी करंगन। ओह कल रामबन ते उधमपुर दे विधायकें ते डीडीसी दे अध्यक्षें कन्नै मलाटी लांगन। एहदा मकसद बजट गी होर समावेशी बनाना ऐ। सारे विधायक तरजीह आहले सैक्टरें च कीते जाने आहले कम्मै बारे अपने विचार सांझा करंगन। इन्हें सैक्टरें दी सूचि पैहले गै डिप्टी कमिशनर आसेआ सरकार गी सौंपी गई ऐ।

<><><><><><>

Lok Sabha Motion

लोकसभा नै संसद दे दौनें सदनें दी संयुक्त बैठक च राष्ट्रपति हुंदे अभिभाषण पर धन्नवाद प्रस्ताव गी स्वीकार करी लैता ऐ। प्रधानमंत्री नरेंद्र मोदी हुंदे जवाब दे मगरा कल मूंह जबानी वोटें कन्नै प्रस्ताव गी स्वीकार करी लैता गेआ। धन्नवाद प्रस्ताव पर बहस दा जवाब दिंदे होई प्रधानमंत्री होरें संविधान दे मूल्यें गी दृढ़ रखने लेई अपनी सरकार दी प्रतिबद्धता गी फही पक्का कीता। राष्ट्रपति हुंदे अभिभाषण बारै बोलदे होई प्रधानमंत्री होरें इस गल्लै गी उजागर कीता जे संविधान च धाराएं दे अलावा एहदी भावना गी जिंदा रक्खना ते एहदे कन्नै असेंगी खड़ोना लोड़चदा। प्रधानमंत्री होरें आखेआ जे एह सरकार दी प्रतिबद्धता, समर्पण ते सख्त मेहनत करी गै संभव होई सकेआ ऐ। उनें आखेआ जे सरकार, राजकोषीय सूझ-बूझ दी पालमा करदे होई तरक्की लेई कम्म करा' रदी ऐ। राष्ट्रपति हुंदे अभिभाषण दी सराहना करदे होई प्रधानमंत्री होरें आखेआ जे एह प्रेरणा देने आहला ऐ ते एहदे' नै सरकार आसेआ विकसित भारत लेई कीती जा' रदिएं कोशिशें गी बल थहोआ' रदा ऐ। प्रधानमंत्री होरें आखेआ जे गरीबों गी चार करोड़ घर दिते गे' न ते देश भरै च 12 करोड़ शौचालय बनाए गेन जेहदे' नै करोड़ों लोकें खासकरी महिलाएं दा जीवन सखल्ला होआ ऐ। उनें आखेआ जे जल जीवन मिशन तैहत गरीब लोकें गी 12 करोड़ थमां मते नलकें आहले पानी दे कनेक्शन दिते गेन जेदे नै दूषित पानी कन्नै फैलने आहिलियां बमारियां घट्ट होइयां न। उनें आखेआ जे उन्दे कार्यकाल च पूंजीगत खर्चे अखराजातें लेई बजटीय सरबन्धी बंड च बड़ा बाददा होआ ऐ ते इसी बधाइयै 11 लकख 21 ज्हार करोड़ रपे थमां बद्द करी दिता गेआ ऐ। उनें आखेआ जे सरकार नै शासन च पारदर्शिता आंदी ऐ जेहदे नतीजें च करोड़ें रुपें दी बचत होई ऐ। उनें आखेआ जे लाहकारिएं दी पंछान दे

कन्नै 3 लक्ख करोड़ रुपें दी बचत होई ऐ। उन्नै आखेआ मध्यम वर्ग गी प्रोत्साहित करने लेई बक्ख-बक्ख कदम पुट्टे गेदे न जेदे कन्नै पिछले 10एं बरें च मती बचत होई ऐ। उन्नै आखेआ जे हाल च गै सरकार नै 12 लक्ख रुपें तक्कर दी टैक्स छूट दी घोषणा कीती ऐ जेड़ा मध्यम वर्ग दे माली हालात गी मजबूत करने आहली भेठा इक बड्डी गैह ऐ।

<><><><><><>

Ramban-Animal Husbandary

पशु पालन मैहकमा रामबन जिले च दुधै दी पैदावार बधाने ते पशुपालकें दी औंदन च बाद्दा करना यकीनी बनाने लेई नियमित तौरा पर केई गतिविधियां ते कार्यक्रम आयोजित करदा आवा करदा ऐ। राई-बाई ते एहदे नै जुड़े दे होरने कम्में दे पूरे-पराते विकास सरबन्धी एच.ए.डी.पी कार्यक्रम तैहत विजन मिट्टी खेतीबाड़ी आहली तकनीक जिसी हायड्रोपानिक्स आखेआ जंदा ऐ, गी बढ़ावा दिता जा रदा ऐ जिसी अपनाइयै पशुएं लेई चारा मती मात्रा च पैदा कीता जाई सकोग ते पशुएं गी सत्तदार खुराक हासल होई सकोग, उंदी सेहत नरोई रौहग, ओह मता दुध देंगन ते पशु पालकें दी औंदन च बाद्दा हाग। स्हाड़े संवाददाता कन्नै इस बारै गल्ल करदे होई रामबन दे जिला पशुपालन अधिकारी डॉ. सुहेल कावूसा होरें आखेआ।

<><><><><><>

Dairy Development

डेरी विकास मिशन दे डरैक्टर नरिंद्र सिंह बाली होरें उधमपुर जिले दा व्यापक दौरा लाया ते चनैनी च इक जागरूकता कैप दा सरिस्ता बी कीता जेदे च कृषि सखी, पशु सखी, ए-हैल्प ते आप सहायता समूहें दे सदस्यें दे अलावा कई करसानें बी शिरकत कीती। इस मौके पशु पालकें

गी सरकार आसेआ उंदी भलाई-बेहतरी लेई शुरू कीती गेदिएं स्कीमें दे बारै च जानकारी दिती
गेई जिंदी मदद कन्नै ओह अपना कम्म शुरू करियै रोजगार कमाई सकदे न।

<><><><><><>

Chief-Secy.

मुख्य सचिव अटल डुल्लू होरें जम्मू दे सैलसफा कन्नै जुड़े दे बक्ख-बक्ख धड़ें दे हितधारकें
कन्नै बैठक लाइयै इत्थूं दी सैलसफा समर्थ दा पूरा-पूरा इस्तेमाल करने बारै उन्दे सुझाव हासल
कीते, टकोहदा करिये श्री माता वैष्णो देवी जी दी जातरा पर औने आहले श्रद्धालुएं दी गिनतरी
दा सलाना 1 करोड़ दे आंकड़े तोड़ी पुज्जने दी पछोक्कड़ै च। बैठक च मुख्य सचिव होरें होटल
मालकें, ट्रांसपोर्टरें ते सैलसफा कन्नै जुड़े दे होरनें धड़ें दे प्रतिनिधिएं कोला पुच्छेया जे उंदे
विचार कन्नै किस चाल्ली मते-मते सैलानिएं गी जम्मू प्रांतै दिएं धार्मिक ते होरनें सैलानी थाहरें
बक्खी आकर्षित कीता जाई सकदा ऐ। मुख्य सचिव होरें उनेंगी आखेआ जे ओह एहदे लेई
प्रचार सामग्री तैयार करन ते कन्नै इस खेततर च उपलब्धि हासल करने आहले दियां सक्सेस
स्टोरियां बी सांझियां करन। उनें आखेआ जे हर सैलानी रूतै लेई बक्खरे तौरा पर सांझी प्रचार
तैयारी होनी लोड़चदी जेदे लेई सैलसफा विभाग पूरा सहयोग देग।

<><><><><><>

J&K Watershed

प्रधानमंत्री कृषि सिंचाई योजना दे इक हिस्से दे तौरा पर वाटरशेड जातरा दी शुरूआत अज्जै
थवां होआ रदी ऐ। एह इक राश्ट्रव्यापी अभियान ऐ। एहदी जम्मू-कश्मीर च शुरूआत राईबाई दी

पैदावार, ग्रामीण विकास ते पंचैती राज मंत्री जावेद अहमद डार होर अज्ज कठुआ जिले दे हीरानगर थवां करंगन। भलेआं अज्जै-कल्लै दिएं सुविधाएं कन्नै लैस वाटरशेड जातरा वैन जम्मू-कश्मीर च 2 जहार 400 किलोमीटर दा सफर तैय करोग। एह वैन लोकें च जागरूकता पैदा करोग। एह अभियान पैहली मार्च तगर चलाया जाग। मुख्य भरै च वाटरशेड जातरा अज्जै थवां गै शुरू होआ करदी ऐ। केंद्री ग्रामीण विकास मंत्री शिवराज सिंह चौहान अज्ज हाइब्रिड मोड च वाटरशेड यात्रा दी शुरूआत करडन। एहदा वर्चुअल ढंगगै सिर जम्मू-कश्मीर च बी प्रसारण कीता जाग।

<><><><><><>

Medical Camp Basantgarh

केंद्री रिजर्व पुलस बल दी 187 बटालियन आसेआ सिविक एक्शन प्रोगाम तैहत डुडु च मुफ्त मेडिकल कैंप लाया गेआ। एह कैंप बटालियन दे कमांडेंट मोहम्मद साजिद हुंदी दिक्ख-रिक्ख च होआ। एहदा मकसद ग्रामीण इलाकें च रौहने आहले लोकें गी बुनियादी सेहत सहूलतां हासल करोआना हा।

<><><><><><>

Cancer Day

महाराजा हरि सिंह फाउंडेशन आसेआ कल सेहत सेवाएं सरबंधी निदेशालय दे सहयोग कन्नै आर.एस.पुरा ते उपजिला अस्पतालै च कैंसर दिवस दे मौके पर इक कार्यक्रम दा सरिस्ता कीता गेआ जेदा मकसद ग्रामीण महिलाएं च कैंसर गी लेइयै जागरूकता पैदा करना हा। इस मौके पर

रितु सिंह होर मुख्ख परौहिनियां हियां जिनें महिलाएं गी कैंसर दे खतरे कोला बचने ते जरूरी एहतियात बरतने बारै जागरूक कीता। स्हाड़े संवाददाता कन्नै गल्ल करदे होई उनें आखेआ।

<><><><><><>

MOU-FCCI

FICCI FLO Jammu, कश्मीर ते लद्दाख चैंप्टर ते केंद्री यूनिवर्सिटी जम्मू बश्कार हुनर गी बढ़ावा देने, उद्यमियता, सेहत ते महिला सशक्तिकरण बारै सहमति पत्र पर दस्तखत कीते गेन। इस पर FICCI-FLOJKL दियां अध्यक्ष रुचिका गुप्ता ते सेंटरल यूनिवर्सिटी जम्मू दे रजिस्ट्रार प्रो. यशवंत सिंह होरें अधिकारिणं ते अमले दी मौजूदगी च दस्तखत कीते। यूनिवर्सिटी दे वाइस चांसलर प्रो. संजीव जैन होरें हुनरमंद महिलाएं, सिंगल गर्ल चाइल्ड आरक्षण, बजार दी मंग स्हाबै कोर्स कराना बगैरा पर जोर पाया। इस साथ सहयोग दा मकसद उद्यमियता सरबन्धी मौकें च बाद्दा ते खेत्तरीय आर्थिक विकास, वैश्विक मंच पर महिला विद्यार्थिणं गी अपनी प्रतिभा दस्सने लेई मंच उपलब्ध करोआना ऐ।

<><><><><><>